

Xajon ra tsikínda jè Pablo ra isìkasén-la xità naxindá-la Cristo ra títsajna ya nangi Galacia

'Én ra ma'tsia-ni

1 ¹⁻² Jiòn ra xità naxindá-la Cristo ma jiòn ra ya titsajna ya nangi Galacia, 'koáá 'sín sixóo'ta-no 'an ra 'mì-na Pablo kò nga'tsì xità-la Cristo ra i títsajnakò-na. Jè xá ítjòn ra 'an tsá'ya, mì tsa kjobítsjen 'tse xità inchrabà-ni kò mì tsa xità isà'nde ra kò'sín tsikí'ta-na. Ngi jè sabá tsikíxáya-na jè Jesucristo kò Nainá ra Na'ín 'mì-lá ra kisikjaáya-ila ya ajin-la mi'ken. ³Nainá ra Na'ín-ná kò jè Jesucristo ra tìjna ítjòn-ná katasíchikon'tin-no kò katatsjá-no kjo'nchán ya ajin inima-no. ⁴Ijyee 'ya-nájiòn nga jè Jesucristo kitsjà kjotjò ijo-la nga 'ken ngajo-ná ta ngatjì 'tse jé-ná, mé-ni nga ma kíjtjokajin-ná jñà kjoa'cho ra tìjn ya isà'nde rakì. 'Koáá 'sín ki'sín koni 'sín kjomejèn-la jè Na'ín-ná ra Nainá ma. ⁵Jé Na'ín-ná ra Nainá ra machjeén-la nga jeya katijna ta mé nìchjin-nioo kò ta mé nó-nioo, kò'sín katama.

Tsìn jngo-isa 'én xitse ra nda tsò a'ta 'tse Cristo ra isa kj'íí tsò

⁶'An, sí ta maxkón-na nga ta nditòón kijmitákon jiòn Nainá, nga yaá tsangìtjìngi-la jngo 'én ra kj'íí 'sín ki'senajmí-no. Kò ijyee ki'chaàjín-no nga jè Nainá xá kiichja-no nga ta jè kjonda-la Cristo kjó'tatakòn. ⁷Mì tsa tsò-ni kjoa nga tìjn jngo-isa 'én nda-la Cristo ra isa kj'íí 'sín tsò. Majìn. Tanga tìjn i'ka xità ra mejèn-la nga minchá skáya-no nga mejèn-la sìikitsón-jin jè 'én nda-la Cristo nga sìikaatjìya-la. ⁸Tanga tsa tìjn jngo xità ra kj'íí tsò 'én ra bakón-ya koni 'sín tsò jè 'én

nda-la Cristo ra jin bakon-ya-lajin, jè Nainá katatsjá i'in-la, ni'sín ti'an-na ko ni'sín jngo ikjalí ra ngajmi nchrabá-ni. ⁹Koni 'sín ijye kotsi'kìn-lajin nga 'sa ítjòn, takó 'koaá 'sín tíxian india-no 'ndi-ni: Tsa yá xita ra kj'íí tsò 'én ra 'bénajmíya-najìòn koni 'sín tsò 'én xitse ra nda tsò ra ijye ichjìbé jìòn, jè Nainá katatsjá i'in-la.

Kó'sín kjomà-ni nga jè Pablo tsikíxáya-la Cristo

¹⁰'An, mì tsa kjonda-la xita ra batsjía, kjonda-la Nainá-ní ra batsjía ra 'an. Ko mì tsa ki batsjía nga nda kótijna ya ngixkon xita, tsa ko'sín mejèn-na nga 'siaan, mì-la tsa kixi-ni kjoa nga chi'nda-la Cristo ma.

¹¹Jìòn 'ndsé ko tichjeé, ko'sín nda katasijin-no a'ta 'tse jè 'én nda-la Cristo ra 'an 'benajmíya, nga mì tsa ta kjobítsjen-la xita-jìn; ¹²mì tsa taxki xita-jìn ra kitsjà-na ko ra tsakón-ya-na jñà 'én kii; jè sabá Jesucristo ra tsakón tsijen-na.

¹³Kina'yá-la jìòn koni 'sín kí'siaan nga ti'sa ítjòn 'kia nga ya kijì'ta-la kjotéxoma 'tse xita judío; kjojtike-náa jè naxindá-la Cristo nga tsahatjingi-la, nga mejèn-na nga katachija. ¹⁴A'ta 'tse kjotéxoma-la xita judío, 'aán ísikíjne-la jñà xita ra taña kjójchá-jin ya naxindá-na, nga isaá 'nó nda kisìhitjasòn koni 'sín tjín xkósòn ra 'ya-ni jñà xita jchínga-na. ¹⁵Tanga jè Nainá, 'koaá 'sín isasèn-la nga 'an tsjahíjin-na skanda ti'kia-ni nga ti'sa jíhi'maa ya aya indsi'ba na-na nga ta koó kjonda-la nga ko'sín kiichja-ná, ¹⁶ko isikatsíjen-na jè 'Indí-la mé-ni nga 'an koma 'kenájmí-la 'én nda-la jñà xita ra mì tsa xita judío. 'Kia nga ko'sín kjomà'tiaan, mì tsa yá xita ra iskonangi-la, ¹⁷ko mì tsa ya nditon kii-jiàan ya ján Jerusalén nga kiikatsjía jñà ra ta'koa ijye tsikíxáya ítjòn-la Cristo. Ta isaá jnchro yaá kiji nditon ya i'nde kixi ra chja-ni naxindá Arabia ko ra kjomà askan-nioo, tsáfaá india-na ya naxindá Damasco.

Kó'sín nga tsajoó jè Pablo ko xita ra i'ka ra ti'koa jè Cristo tsikíxáya-la

¹⁸'Kia nga tsato ján nó nga ijye kíjtsexkon Jesucristo, 'kiaá kijiàa ya ján Jerusalén nga ikatsíjen-la jè Pedro, ko chrjò'òn nichjin ya tsakátijnaa ya ni'ya-la. ¹⁹Mì kì kíjtse-isaá xita ra kj'íí ra ta'koa ijye kisìxáya ítjòn-la, ta jè 'ndse Na'ín-ná ra 'mì

Jacobo ra kítsee. ²⁰Jè 'én ra ko'sín tíbi'tá-no xajon, tíkotsíjen Nainá, mì tsa 'én ndiso-jìn, ngi 'én kixi-ní.

²¹Ra kjomà askan-ni yaá kijiàa ya nangi Siria ko nangi Cilicia. ²²Tanga jñà nichjin kii, kjè kì tsa bexkon-na jñà xita naxindá-la Cristo ra títsajna ya nangi Judea. ²³Jñà xita kii, tà kií'nchré-ró nga jè xita ra tsahatjìngi-la kjotseeé, 'ndi 'ndi, jè-ró 'bénajmíya 'én nda-la Cristo, jè 'én-la Nainá ra mejèn-la kisikitsón-ya tsiki. ²⁴Ko jeya isíkíjna Nainá 'kia nga kií'nchré koni 'sín nga jahatjìya-na.

**Kó'sín nga kitsjà nga'ño-la jè Pablo jñà xita
ra tsikíxáya ítjòn-la Cristo**

2 ¹'Kia nga askan-nioo nga ijchò te ijòn nó, kiji india-na ya ján Jerusalén, tjen-ko-na Bernabé; tí'koaá tsakáhijtakò-na Tito. ²Kií kiji-na nga kitjasòn koni 'sín nga isìchiya tsijen-na Nainá. 'Kia nga ijye ya tíjna, yaá ítsi'kenajmí-la kó'sín nga 'an ítsakon-yá-la 'én xitse ra nda tsò a'ta 'tse Cristo jñà ra mì tsa xita judío. A'ta xín ítsi'kenajmí-la jñà xita ra xá 'nga tjín-la a'ta 'tse 'én nda-la Cristo. Kií ko'sín kí'sin-na nga kata'ya-la nga mì tsa ta kjotjò-ni jè xá ra tí'siaan ko jè ra ijye kí'siaan. ³Ni'sín takó xita griego jè Tito ra tjiko-na, mì tsa yá ra kjo'ño ki'sin-la nga isi'ta chiba ijo-la ra kjoa 'tse circuncisión. ⁴Tanga tjín i'ka xita ndiso ra ta 'jaha'sen-jin chijé-ní ra ko'sín kitsò nga ijyee makjiín-la a'ta 'tse Cristo. Tanga ta jè ra mejèn-la nga ske mé ra 'nié, jién ra ijye titsahijyondií-lá a'ta 'tse kjotéxoma 'tse Moisés, ta ngatjì-la nga ijye makjiín-ná a'ta 'tse Cristo Jesús; ta jñà mejèn-la xita kii nga kjo'ño 'sín-ná nga sihitjasén jè kjotéxoma 'tse Moisés. ⁵Tanga ngajin, mì kì inisin-lajin, nga jè ra mejèn-najin nga jè kjoakixi ra 'tse 'én nda-la Cristo, yaá katijnajin ki'ta-najìon.

⁶Jñà xita ra xá 'nga tjín-la, nimé ra kjoa xitse kitsjà-isa-na koni 'sín nga ijye 'an bakon-yáa. Tanga 'an, mì tsa jè fi-na tsa jñà xita ítjòn kii 'ño nda ki'yaxkón, nga jè Nainá mì tsa jè kotsíjen kó'sín nga 'yaxkón xita. ⁷Ta isaá jnchro kjòchíyaá-la nga jè sabá Nainá kisìngatsja-na xá mé-ni nga 'an kichjàyajin-la 'én xitse ra nda tsò a'ta 'tse Cristo jñà ra mì tsa xita judío ra mì tsa tjí'ta chiba ijo-la kjoa 'tse circuncisión; ko jè Pedro kjongatsja xá nga jè kichjàyajin-la jñà ra xita judío ra tjí'ta chiba ijo-la kjoa 'tse circuncisión. ⁸Jè Nainá ra isikasén jè

Pedro nga jè kichjayajin-la 'én nda-la Cristo jñà ra xita judío, tijé-ni ra isikasén-na nga 'an kichjàyajin-la jñà ra mì tsa xita judío.

⁹Jè Jacobo, Pedro ko jè Juan, jñà ra ko'sín nda ki'yaxkón nga xita ítjòn tsikìtsahijyo-la xita naxindá-la Cristo, kijtse-ní nga jè Nainá kitsjà-na jè kjonda kii; kjojngoó ikon akjòn kitsjá-najin tsja ngajò-najin, 'an ko jè Bernabé, mé-ni nga kijcha-la nga ta jngoó xá inchi'nià-jin. Ko tsjaá ki'se-la nga ya tsangì níxáko-jin jñà ra mì tsa xita judío, ko ra jñà, yaá isíxáko jñà ra xita judío. ¹⁰Ta jé-ní jngo kjonda isíjé-najin, nga mì kì tsa sijchaàjin-jin jñà xita ima. Ko jñà jnchro kjoa kii ra tíbiné-la ijo-na nga 'siaan.

Kó'sín nga jè Pablo tsakátiko jè Pedro ya naxindá Antioquía

¹¹India, 'kia nga jè Pedro 'ji i naxindá Antioquía tsakatíko-náa ya ajin-la xita, nga mì kì nda tjín kjoa ra ki'sín. ¹²'Kia nga 'sa ítjòn, yaá tsakjèn-ko jñà xita-la Cristo ra mì tsa xita judío; tanga ra kjomà askan-nioo, mì kì tì ya tsakjèn-ko-nì, 'kia nga 'ji jñà xita judío ra tì'koaá makjiín-la a'ta 'tse Cristo ra ya tjímako Jacobo; tsasèn'taxín-ní, nga jñà itsakjòn-la jñà xita judío ra tjen-ko Jacobo, jñà ra kjo'ño mejèn-la nga si'ta chiba ijo-la xita-la Cristo ra mì tsa xita judío ra a'ta 'tse circuncisión. ¹³Tì'koaá jñà xita judío ra i'ka ra makjiín-la 'én-la Nainá, yaá isíngàsòn-ko kjoa ra kiskàjin Pedro ra jò isén tsakón; skanda jè Bernabé kiskàjín-te kjoa kii. ¹⁴'Kia nga kítsee nga mì kì ko'sín inchisíhitjasòn koni 'sín tjín kjoakixi ra a'ta 'tse 'én nda-la Cristo, 'koaá 'sín kixin-la jè Pedro ya ngixkon nga'tsi xita: “Ji, xita judío-ní, tanga mì tsa ko'sín tjínjíchí ijo-li koni tsa xita judío, ¿kó'sín ma-ni nga kjo'ño 'nià-la ji jñà ra mì tsa xita judío nga ko'sín katasíjchá ijo-la koni tsa xita judío?”

¹⁵Jièn ni'sín kixi kjoa nga tje-la xita judío meé, nga mì tsa ya kitsin-jín-lá jñà ra mì tsa xita judío ra ko'sín na'yá-la nga xita-jé. ¹⁶Tanga 'ya-né nga nijngo xita ra kixi kájna ya ngixkon Nainá ra ta ngatjì-la nga nda síhitjasòn kjotéxoma ra itjábé-la jè Moisés, ta jé-ní tsa ya kokjiín-la a'ta 'tse Jesucristo. Jièn, ijyee ya kjokjiín-ná a'ta 'tse Jesucristo, ko jè Nainá, xita kixi síkijna-ná 'kia nga ijye ya makjiín-ná a'ta 'tse Cristo. Ko mì tsa ki-ni nga nda nihitjasén kjotéxoma, ta ngatjì-la nga nijngo xita ra kixi kájna ya ngixkon Nainá ni'sín nda síhitjasòn jè kjotéxoma 'tse Moisés.

¹⁷'Ndi-ni, 'koaá 'sín chiñá-lá nga kixi kitsajneé ya ngixkon Nainá ta ngatji-la nga ijyee ya makjiín-ná a'ta 'tse Cristo, [mì tsa ki-ni nga inchiniitjasén kjotéxoma]. 'Koaá ma-ni nga ko'sín xita jé bitjongieé [koni 'sín 'mì-la jñà ra mì tsa xita judío]. Tanga, ¿a tsó-ni kjoa nga jé Cristo tímahítsjajín-ná jé? Majìn, mì tsa ko'sín tjín-jìn. ¹⁸Tsa jè kjotéxoma ra 'an ijye ítsachrjéngia, india sihitjásòn india-na, yaá jndáa nga jé tibatjí-la ijo-na. ¹⁹Tijé-ni kjotéxoma ra ya kjójchájiaan kisi'ken-na mé-ni nga 'ndi-ni ijyee tíjñandií-na a'ta 'tse kjotéxoma rakli nga ko'sín ma kótijnakon-na nga sihitjásòn-la Nainá. ²⁰Kia nga 'ken ya a'ta krò jè Cristo, yaá 'ken'ta-te-la ra 'an; ko mì tsa ti 'an-naa ra tíjñakon; jé Cristo ra ya tíjñajin ya inìma-na. 'Ndi-ni, kií tíjñakon-na nga jè kji'tatákon jè 'ndí-la Nainá ra kjotsjake-na ko kitsjá ijo-la nga jè 'ken-tji ngajo-na. ²¹Mì kì nda tjín nga kináchrjengieé kjonda 'tse Nainá. Tsa ko'sín kixé nga a'ta 'tseé kjotéxoma nga kixi kitsahijyee ya ngixkon Nainá, mí-la mé chí-la nga ko'sín 'ken Cristo tsa'koa.

Mé kjoa-ni nga ma tjábé-ná jè Inìma Tsje-la Nainá

3 ¹Jiòn xita ra i'nde Galacia tsajiòn, mé ta imakjoa-no! ¿Yá ra ta nda tsikíndisoko-no? ¿A mí bítsjen-no nga nda kjón-ní tsakon-ya-lajín kó'sín nga jè Jesucristo 'ken'ta krò ra kjonda tsajiòn? ²Ta jé ra mejèn-na nga ko'tín-nájiòn: ¿A kií itjábé-najiòn jè Inìma Tsje-la Nainá nga nda inìhitjasòn jiòn jè Kjotéxoma o ra kií-ní nga nda kjokjiín-najiòn 'én nda-la Nainá ra ina'yá? ³Nga tì'sa ítjòn, ndaá tsiki'tsiako-nájiòn kjobítsjen ra kitsjà-no Inìma Tsje-la Nainá, ko, ¿mé-ni 'ndi-ni, ta kjobítsjen 'tse xita mejèn-no nga isa nda sijchá-no ijo-no? ¿Mé ta imakjoa-no! ⁴¿A ta kjotjó-ni nga'tsi kjohi'in ra ijye tsato jiòn 'kia nga kjokjiín-no? 'Koaá ma-na nga mì tsa ta kjotjó-jìn. ⁵'Kia nga jè Nainá kitsjà-no jè Inìma Tsje-la ko tsakón-no kjojkón-la ra nda tjín, ¿mé-ni ko'sín ki'sìn-ni? ¿A kií-ní nga nda kinìhitjasòn jiòn jè kjotéxoma? Majìn, kií-ní nga nda kjokjiín-no 'kia nga ina'yá jè 'én nda-la Nainá.

Mé kjoa-ni nga xita kixi kijtsetakòn Nainá jè Abraham

⁶'Koaá jngoya-la koni tsa jè Abraham, “ndaá kjokjiín-la a'ta 'tse Nainá; 'koaá ma-ni nga ko'sín kitsò-la Nainá nga xita kixi-ní.” ⁷Ko'sín nda katasijin-no: Jñà ra ko'sín makjiín-la

koni 'sín jè Abraham kjokjiín-la a'ta 'tse Nainá, jñá-ní ra ko'sín koma ixti-la Abraham 'kín. ⁸'Koaá 'sín tìngi kitsjá-ni 'Én-la Nainá koni 'sín nga tíchja Xajon-la nga xita kixíí 'siin jñà ra mì tsa xita judío 'kia nga ya kòkjiín-la a'ta 'tse. Yaá 'ya-la ñándà nga Nainá tjen kitsjá-la Abraham jngo 'én ra nda tjin nga kitsò-la: “Nga'tsi jñà naxindá ra tjin ya isà'nde, a'ta tsaji-ní nga kochikon'tin.” ⁹'Koaá ma-ni, koni 'sín kjòchikon'tin jè Abraham nga kjokjiín-la a'ta 'tse Nainá, tì'koaá yaá machikon'tin-ko nga'tsi jñà xita ra ko'sín kòkjiín-la a'ta 'tse Nainá.

¹⁰Nga'tsi xita ra jè ma'ñó'ta takòn nga inchisíhitjasòn kjotéxoma, tseé kjohi'in kjinè-la. Nga 'koaá tì'sín tsò xajon ra tí'ta 'én-la Nainá nga tsò: “Kjohi'in katasinè-la nga'tsi xita ra mì ko'sín kixi síhitjasòn nga'tsi kjoa ra tí'ta ya xajon 'tse kjotéxoma.” ¹¹'Koaá 'sín ma-ni nga yaá 'ya-la nga nijngo xita ra kixi kína ya ngixkon Nainá ta ngatji-la nga síhitjasòn kjotéxoma; nga tsò-te xajon ra tí'ta 'én-la Nainá: “Jè ra xita kixi, jè kijnakon-ni nga makjiín-la a'ta 'tse Nainá.” ¹²Tanga jñà xita ra kjotéxoma síhitjasòn, mì tsa Nainá kji'ta ikon. Nga tsò Xajon ra tí'ta 'én-la Nainá: “Jè ra nda síhitjasòn kjotéxoma, 'koaá 'sín tjinè-la nga ya katasíjchájin ijo-la.” ¹³Jè Cristo tsikíhjtí-ná nga ma tsachrjekàjin-ná kjohi'in 'tse kjotéxoma, nga jè iskanè jé-la ta ngatji tsajién, nga 'koaá 'sín tsò xajon ra tí'ta 'én-la Nainá nga tsò: “Nga'tsi ra ko'sín si'ta krò, 'nó tse kjohi'in katanè-la.” ¹⁴'Koaá 'sín kjomà mé-ni nga a'ta 'tse Cristo tjábé-la jñà xita naxindá ra mì tsa xita judío jè kjonda ra ijye Nainá kòkitsò-la jè Abraham, ko mé-ni 'kia nga ko'sín makjiín-ná a'ta 'tse Cristo maá tjábé-ná jè Inìma Tsje-la Nainá, nga ijyee ko'sín kitsjà tsa'ba Nainá nga tsjá-ná.

Jè nga'ñó ra tjin-la jè 'én-la Nainá ra tsa'ba ki'tsi-la Abraham

¹⁵Jìòn 'ndsé ko tichjeé, kijná jngo-no xkòsòn koni 'kia nga jñà xita bájna masen jngo xajon nga bíndajín jngo kjoa. 'Kia nga jè xajon rakìi ijye ma firma, ko sinchá-la sello, mì kì yá ra ma kochrjengi ko niyá ra ma kù'tasòn-isa-la koni 'sín nga ijye tíchja. ¹⁶Nainá, 'koaá 'sín kitsjá-la 'én-la jè Abraham ko jè xita ra tje-la ma. Jè xajon ra tí'ta 'én-la Nainá mì tsa tsò-jìn: “jñà xita tje-la.” Ta tsò-ní: “jè xita tje-la.” Nga mì tsa kjin ma-ni xita tje-la ra ko'sín ki'tsi-la 'én, ta jngoó ma-ni. Ko jè Cristo ra

ko'sín kitsò-la. ¹⁷Jè kjoa ra tí'bènájmí-najìòn, kíí 'sín tjin: Jè kjoa ra tsikíndajín-ko Abraham jè Nainá, ta'koa ijyeé kjoatsee tjna 'kia nga 'ji jè kjoatéxoma. Ta'koa kjo ijòn sindo ko katé nó tsato 'kia nga tsí'kì-la kjoatéxoma rakìi jè Moisés. Ko mì kì ma bachrjengi jè kjoa ra ijye tsikíndajín jè Nainá ko jè Abraham, tí'koa mì kì ma sìkítsón-jin jè 'én ra ijye kitsjà Nainá.

¹⁸'Kia nga jè Nainá ko'sín tsjá-ná kjònda-la, mì tsa ki-ni nga nihitjasén jè kjoatéxoma, ki-ní nga ijyeé ko'sín kitsjà 'én-la. Nga ta kjoató kitsjà-la kjònda jè Abraham koni 'sín nga ijye kitsò-la.

Mé xá ra 'ji-ni jè kjoatéxoma

¹⁹¿Mé xá isinda-ni jè kjoatéxoma tsa'koa? Kíí ko'sín isinda-ni ta ngatji-la a'ta 'tse kjoa'cho ra 'sín jñà xita. Ko isijna-ní skanda 'kia nga ijye 'ji jè tje-la Abraham koni 'sín ijye kitsjà-la tsa'ba Nainá. Jè kjoatéxoma, jñà ìkjalì 'jiikó nga isichjeén jè Moisés mé-ni ma kisika'ta-la jñà xita ra i'ka, nga jè Moisés tsasijin-la xita. ²⁰Tsa 'kia jngo xita ko'sín jè basèn-jin nga sindajín jngo kjoa, mì tsa ta jngo fi-ni, tanga jè Nainá jngoó kiji-ni ra jè, 'kia nga kitsjà-la 'én Abraham nga tsikíndajín jngo kjoa.

²¹'Kia nga jè Nainá 'jiikó kjoatéxoma, mì tsa kondra kiji-la 'én ra ta'koa ijye kjoatsee kitsjà-la Abraham. Tsa jé-la kjoatéxoma tjin-la nga'nó nga ma tsjá ra kjobinachon, ma-la xita kixi koma-ni xita tsa'koa tsa nda sìhitjasòn kjoatéxoma. ²²Tanga jè xajon ra tí'ta 'én-la Nainá, 'koaá 'sín tsò nga nga'tsì jñà xita, yaá títajin jé. Ta jngoó 'kia nga kokjiín-la a'ta 'tse Jesucristo koma tjàbé-la kjobinachon ra ijye ko'sín kitsò Nainá nga tsjá-la jñà xita ra kokjiín-la.

²³'Kia nga tikjè 'fiì jè kjoa ra makjiín-ná, yaá itsabá'nó-ná jè kjoatéxoma, ko yaá tsikítsai'ya-ná skanda 'kia nga kijcha-la jè kjoa ra makjiín-ná. ²⁴Ko jé kjoatéxoma isikínda-ná koni 'sín makínda jñà ìxti, skanda 'kia nga 'ji jè Cristo mé-ni nga ma kixi bitsajna-ná 'kia nga makjiín-ná a'ta 'tse. ²⁵'Ndi 'ndi 'kia nga ijye 'ji jè kjoa ra makjiín-ná, mì tsa tijè kjoatéxoma itsabá'nó-isa-ná.

²⁶Nga'tsì-najìòn ijyeé ìxti-la Nainá ma jìòn ta ngatji-la nga yaá títajnakoo Cristo nga makjiín-no a'ta 'tse. ²⁷'Kia nga ya títajnakjokoo jìòn Cristo nga isatínda jìòn, 'kiaá jahatjiya-najìòn koni 'sín 'sín jngo xita nga síkaatjiya nikje-la;

ko jè sabá Cristo ra kjomà nikje xit̄se ra itsjaya jìòn. ²⁸Mì tsa jñà tíma kindá, a xit̄a griego-ní, o ra xit̄a judío-ní; a ndí xit̄a chí'nda'ño-ní o ra majin-ní; a xit̄a 'xin-ní o ra chjoón-ní; nga nga'tsi-no ta jngoó ijo ma-najìòn, ta ngat̄jì-là nga ya titsajnakjo-koò Cristo Jesús. ²⁹Nga xit̄a-là Cristo ma jìòn, tì'koa t̄jè-là Abraham ma-te jìòn, ko tì'koaá t̄jábé-nájìòn jè k̄jot̄jò ra Nainá tsjá, koni 'sín ijye kitsjà-là tsa'ba jè Abraham.

4 ¹Ijngo-isa xkósòn kijná-no: 'Kia nga 'sa jtobá 'ki jngo ti, ta ma ta yaá mangásòn-ko jè chí'nda, kjè tsa jè be ya ni'ya-là, skanda 'kia-ní, 'kia nga ijye bijchó nó-là nga jè ma ni-là nga'tsi tsajmì ra t̄jín-là na'n-là. ²Nga 'kia 'sa jtobá 'ki-isa, machjeén-ní nga xit̄a síkinda-isa ra jè, ko tsijen t̄jín-te xit̄a ra síkinda jñà tsajmì ra 'tse, skanda 'kia nga bijchó jè nichjin nga ngi jè sìikinda sabà koni 'sín ijye tsikíjna nichjin jè na'n-là. ³Jiéñ ra xit̄a 'mí-ná, 'koaá t̄i'sín kjòn kjomé koni tsa ixti; 'kia nga tik̄jè makjiín-ná a'ta 'tse Cristo, jñà k̄jot̄éxoma ra t̄jín i isà'nde, jñá 'ño tsatéxoma-ná koni tsa chí'nda'ño-là kjomé. ⁴Tanga 'kia nga ijchò nichjin koni 'sín nga ijye t̄jinda-là Nainá; jé Nainá isikasén I'ndí-là i a'ta nangi nga i kitsin, nga isichjeén jngo ndí chjoón nga jè kitsin-là, koni 'sín tsin xit̄a isà'nde, ko yaá kojchájín k̄jot̄éxoma 'tse xit̄a judío. ⁵Kií ko'sín ki'sin-ni Nainá nga kisikasén I'ndí-là, mé-ni jñà xit̄a ra ya títsajin k̄jot̄éxoma, koma kítsajnandií-ni ko mé-ni ngásòn ngáya ma skaábétjò-ná Nainá nga ixti-là kitso-ná.

⁶'Koaá ma-ni 'ndi-ní, 'kia nga ijye ixti-là 'mì-ná, jè Nainá isikasén jè Inìma Tsje ra 'tse I'ndí-là ya ajin inìma-ná. Jè Inìma Tsje ra isikasén tsò-ní: “Jì apá.” ⁷'Koaá ma-ni nga 'ndi 'ndi mì tsa tì chí'nda'ño titsajna-ná. Ijyeé ixti-là tsó-ná jè Nainá; ko 'ndi-ní nga ijyeé ixti-là tsó-ná, 'koaá 'sín tsjá-te-ná jè k̄jot̄jò ra ko'sín t̄jínanda-là nga sìngatsja jñà ra ixti-là ma.

Kó'sín nga síkájno Pablo a'ta 'tse xit̄a Gálatas ra makjiín-là 'én-là Nainá

⁸'Kia t̄i'sa k̄jotseé nga tik̄jè 'yaxkon jìòn jè ra ngi jè sabà Nainá, yaá kjomà jìòn chí'nda'ño-là jñà nainá ra mì tsa kixi-ni kjoa nga nainá. ⁹Tanga 'ndi 'ndi, 'kia nga ijye 'yaxkon jìòn ra ngi jè sabà Nainá, (o ra isaá nda jnchro tsa k̄i'sín xián-no, 'ndi 'ndi 'kia nga ijye jè sabà Nainá bexkon-no), mé-ni ko'sín nikaatjìya-la jè k̄jóbítsjen-no nga mejèn-no ya mangí'ta-la jñà

kjotéxoma imā ra t́jín-no, jè ra tsìn-lā nga'ñó kō nímé chjí-lā? ¿A mején-no nga ya jtsabā'ñó india-no? ¹⁰ Jiòn takó 'ñó 'yaxkón jiòn jñā níchjin ra 'tse 'sí, níchjin ra 'tse sá, kō níchjin ra 'tse nó. ¹¹ Makájno-na koni 'sín nga inchi'nià jiòn. 'Koaá ma-na, nga ta ra 'aa-na 'kia nga kō'sín kisíxá-jin-najiòn.

¹² Ra 'an, tsásen'táxín-lā jè kjotéxoma koni 'sín nga tincha'tàxìn-la jiòn tì'sā kjotseé. Kō 'koaá 'sín śjé-no 'ndi-ni nga kō'sín tincha'tàxìn-la koni 'sín nga 'an tsásen'taxín-lā. Nga ngà'sa ítjòn mì tsa mé ra tsi'kín-nájiòn. ¹³ T́j́j́j́n-najiòn nga ta kíí ngatjì-lā jè 'chin ra t́jín-na nga kō'sín ijchò ya naxindá-najiòn, kō yaá kina'yá ítjòn jiòn jè 'én xitse ra nda tsò a'ta 'tse Cristo ra 'an tsi'kènájmíya-no. ¹⁴ Ni'sín kísijtí chiba-najiòn ta ngatjì-lā jè 'chin ra t́jín-na, mì tsa inachrjengi-nájiòn kō ni mì tsa iníkíjna'taxín-nájiòn; ta isaá jnchro nda ichjíbétjò-nájiòn koni tsa ikjalí 'tse Nainá kō koni tsa jè sabá Cristo Jesús. ¹⁵ ¿Nánda t́jna jè kjotsja ra kō'sín ta nda kí'se-najiòn nga tì'sā ítjòn? Maá koxiáan ra a'ta tsajiòn, 'kia nga tì'sā ítjòn, sí mején-najiòn nga ḱnáchrje jiòn jñā xkòn, nga mejèn-no nga tsi'kí-ná. ¹⁶ ¿A kondraá t́jna-najiòn 'ndi-ni, 'kia nga kō'sín ḱxín-najiòn koni 'sín t́jín ra ngi kjohixi?

¹⁷ Jñā xitā ra kō'sín tsò-najiòn nga machjeén-ní nga sihitjasòn kjotéxoma, batoó 'ñó mejèn-lā nga ya kongítj́ngi-la jiòn, tanga mì tsa kjobítsjen nda-jìn ra t́jín-lā. Ta jé ra mejèn-lā nga kítjò'taxín-nájin mé-ni nga ya kongí'ta-la jiòn. ¹⁸ Ndaá t́jín 'kia nga jngo kjoā 'ñó mejèn-ná 'sieén, tanga tsa ta ndaá t́jín kjoā ra mejèn-ná. Jé ra mejèn-na nga kō'sín 'sian ki'ta jiòn; mì tsa ta 'kia-jìn 'kia nga ya t́j́nako-najiòn. ¹⁹ Jiòn ra koni tsa ndí ixti-nā xian-no, ra a'ta tsajiòn tísikjín india-na kjohi'in koni 'sín síkijín kjohi'in jngo ndí chjoón 'kia nga tsin ndí i'ndí. Jè kjohi'in rakíi, 'kiaá kjehe'tà skanda 'kia nga ijye jè Cristo nda ḱjnajin ya inìma-najiòn. ²⁰ ¿Sí mején-na tsa ya t́j́nako kjòn-najiòn 'ndi 'ndi, mé-ni nga ma kokónajmí-najiòn 'én ra kj'íi tsò, nga ijyeé mì kì tì be-na kó'sín síkítsjen ra a'ta tsajiòn!

Kó tsò-ni kjoā ra kjomà a'ta 'tse chjoón ra 'mì Sara kō Agar

²¹ Jngo 'én kō'tín-ná, jiòn ra jè mejèn-no nga kjoā 'tse kjotéxoma siitjasòn. ¿A kjeé na'yá-la jiòn kó'sín tsò jè kjotéxoma ra t́j'ta xajon 'tse Moisés? ²² 'Koaá 'sín tsò nga jè Abraham, jò ixti kí'se-lā; jngo ra 'tse chjoón chí'nda-lā kō jngo

ra ngi 'tse ra ngi chjoón-la. ²³Jè i'ndí-la chjoón chi'nda, 'koaá 'sín kisakò koni 'sín sakò nga'tsì ra ta kj'íí ixti; tanga jè i'ndí ra ngi 'tse chjoón-la, 'koaá 'sín kisakò-la nga jè itjasòn koni 'sín ijye kitsjà-la 'én-la Nainá jè Abraham. ²⁴Kjoa kii, tjin jngo kjoa ra bakón-ya-ná; ngajò íchjín kii jñà chja-ni ngajò kjoa ra tsikíndajín Nainá; jè chjoón ra 'mì Agar, 'koaá jngoya-la koni jè kjoa ra kisindajín ya nindo Sinaí 'kia nga tsi'ki-la kjotéxoma jè Moisés. Nga jñà ixti-la jè chjoón ra 'mì Agar ta xita chi'ndaá kjomà ki'ta. ²⁵Jè chjoón ra 'mì Agar jè jngoya-la jè nindo Sinaí ra síjna ya ján nangi Arabia; kò 'koaá jngoya-te-la jè naxindá Jerusalén ra tijná 'ndí-ni, nga jñà xita-la naxindá rakii chi'nda'ño títsahijyo a'ta 'tse kjotéxoma. ²⁶Tanga jè naxindá Jerusalén ra tijná ya ján ngajmi, tijnandíí-ní, kò yaá nakjoá-ná a'ta 'tse naxindá rakii; 'koaá jngoya-la koni tsa na-ná ma.

²⁷Nga 'koaá 'sín tíchja xajon ra tíí'ta 'én-la Nainá nga tsò:

'Nó tsja 'tè-la takìn jì ra chjoón 'ndí 'mì-li,

ngaji ra mì tsa ixti kitsin-li.

'Nó chjindáya-ni kjotsja-li,

nga mì kì 'yi jì kó'sín ma 'kia nga tsin ixti.

Nga jè chjoón ra kijmitákon, isaá kjìn ma-ni ixti-la,

nda mí 'koa-ni koni jè chjoón ra tjin 'xin-la.

²⁸Jìon ndí 'ndsé kò tichjeé, 'koaá jngoya-te-la jìon-jìon kò jè Isaac, yaá majngo'tá-la jìon ixti ra jè Nainá kò'sín kitsò-la nga tsjá-la jè Abraham kò Sara. ²⁹Jè i'ndí ra taxkì isakò ra a'ta 'tse chjoón chi'nda, kjojtike-ní kò tsahatjingi-la jè i'ndí ra a'ta 'tse Inìma Tsje-la Nainá 'ji-ni; koni 'sín kjomà jñà nichjin kiò, takò 'koaá chon nichjin 'ndí 'ndí. ³⁰Tanga, kó tsò jè xajon ra tíí'ta 'én-la Nainá? Tsó-ní: “Tìitjingi-la jè ra chjoón chi'nda kò jè i'ndí-la; nga jè i'ndí-la, mì tsa mé kjotjò ra tjábé-la; ta jé tjábé-la kjotjò jè i'ndí-la ra mì tsa chjoón chi'nda.” ³¹'Koaá ma-ni jìon ndí 'ndsé kò jìon ndí tichjeé, ra jién, mì tsa ixti-la chjoón chi'nda meé ra jién; jién-ná ixti-la ra mì tsa chjoón chi'nda.

Kó'sín machjeén nga kixi kitsajneé 'kia nga ijye titsajndieé

5 ¹Jè Cristo jngó kjá isíkítsajndíí-ná a'ta 'tse kjotéxoma-la Moisés; 'koaá 'sín xian-no nga kixi titsajna jìon koni 'sín nga ijye isíkítsajndíí-no jè Cristo; kì tì ya mangítjingi india-la jè kjotéxoma ra itsabá'ño-no nga tì'sa kjotseé 'kia nga chi'nda'ño-la kjomà jìon.

²'An ra 'mì-na Pablo, tìná'yá-ná, 'koaá 'sín tíxin-no; tsa kí'ta ch̄ba-isa jìòn ijo-no ra kjoa 'tse circuncisión, mì tì mé kjonda sakò-no ra a'ta 'tse Cristo. ³'Koaá 'sín tíxian india-no, nga'tsi x̄ta ra bí'ta ch̄ba ijo-la ra kjoa 'tse circuncisión, kjo'ño t̄jìnè-la nga s̄hitjasòn ijye koni 'sín t̄jín kjotéxoma.

⁴Jìòn ra ko'sín mejèn-no nga a'ta 'tse kjotéxoma, kixì kitsajna ya ngixkon Nainá, ijyeé tsincha'taxìn-la jè Cristo kò ijyeé tsincha'taxìn-te-la jè kjonda ra tsjà kjotjò-ná Nainá. ⁵Tanga ra j̄in, a'ta 'tseé jè Inìma Tsje-la Nainá inchichiñá-laj̄in nga ma kixì kitsajna-j̄in ya ngixkon Nainá ta ngat̄jì-la nga makj̄iín-naj̄in a'ta 'tse Cristo. ⁶Tanga ra a'ta 'tse Cristo Jesús, mì tsa t̄jè ma-ni kindá a t̄jì'ta ch̄baá o ra mí tsa t̄jì'ta ch̄ba ijo-la x̄ta ra kjoa 'tse circuncisión; ta jé ra ma kindá kó'sín nga makj̄iín-ná a'ta 'tse Cristo kò kó'sín nga t̄jín-ná kjotsjacha.

⁷Ndaá ndiyá inchimangí jìòn tsiki; yá ra tsatéchjà-no nga mì tì nihitjasòn-no 'én nda-la Nainá ra ngi kjohixì. ⁸J̄nà kjob̄ítsjen k̄i, mì tsa ya nchrabá-ni a'ta 'tse Nainá ra xá kiichj̄a-najìòn. ⁹Tik̄inda kosa-no ijo-no, nga “nì'sín ta itsé-ni na'yo san ra koaájin-la jè na'yo ra ma niño nchraj̄in, sísan ijye-ní nì'sín takó tse ma-ni na'yo.” ¹⁰'An, 'koaá 'sín ba'tá ikon Nainá nga mì tsa kj̄ií kjob̄ítsjen kj̄inchrabà-najìòn koni 'sín nga kíxian-no. Tanga jè Nainá tsj̄a-la kjohi'in jè x̄ta ra t̄síkitsón-jin-najìòn, nì'sín ta yá x̄ta-nì.

¹¹Jìòn 'ndsé kò tichjeé, tsa takó 'koaà-la 'sín tí'bènájmíya ra 'an, nga machjeén-ní nga katasi'ta ch̄ba ijo-la x̄ta ra kjoa 'tse circuncisión, mí-la tsa ko'sín koaàt̄j̄ingi-na j̄nà x̄ta judío, nga mì tsa mé ra 'cho kiya-la koni 'sín tsò 'én ra 'an 'benájmíya a'ta 'tse Cristo 'kia nga isi'ta krò ra jè. ¹²Tsa jngó kjá ngi katabate'tá j̄nchro ijo-la x̄ta k̄i, j̄nà ra ko'sín síkitsón-jin-najìòn nga tsò-no nga machjeén-ní nga si'ta ch̄ba ijo-no ra kjoa 'tse circuncisión.

¹³Jìòn 'ndsé kò tichjeé, kíí xá inakjoá-najìòn nga kitsajnand̄i jìòn, tanga nì'sín titsajnand̄i jìòn k̄i tà ch̄jàn ko'sín 'nià koni 'sín t̄jín kjoa ra mejèn-la ijo-no; jè ra machjeén nga t̄sìko kañá jìòn xàngioo kò nga kata'se-no kjoatsjacha nga jngó jngó-no. ¹⁴Nga nga'tsi kjotéxoma ra kitsjà Nainá yaá bitjasòn ijye a'ta 'tse jè ra tsò: “Ko'sín tsjacha 't̄iín j̄nà x̄ta xàngiì koni 'sín nga tsjachi ijo-li.” ¹⁵Tanga tsa t̄jìòn inchichinejin inchichine'a-no

xàngioo, tìkindaa ijo-no nga kijchó nìchjin nga tjiòn sikkitsón-no xàngioo tsa ko'sín 'nià.

Mé kjoa'cho ra síjé ijo-ná

¹⁶ 'Koaá 'sín tíxian-no: Tì'nde-la nga jè Inìma Tsje-là Nainá nda kjón ndiyá katafiko-no, mé-ni nga mì ya koàtjingi-la kjoa'cho ra síjé ijo-no. ¹⁷ Jñà kjoa'cho ra síjé ijo-ná kondraá fì-là jè Inìma Tsje-là Nainá. Ko jñà kjoa ra mejèn-là jè Inìma Tsje-là Nainá kondraá fì-là jñà kjoa'cho ra mejèn-là 'sín ijo-ná. Jñà kjoa kii, kjaán-kjóo ma. 'Koaá ma-ni nga jiòn, mì kì ko'sín 'nià jiòn koni 'sín nga mejèn-no nga 'siaan. ¹⁸ Tanga tsa jè Inìma Tsje-là Nainá tíbasén ndiyá-no nga nìchjin nchijòn, mì tsa tjiè-ni kjotéxoma tíjna ítjòn-no.

¹⁹ Nga tsijeén 'ya-là jñà kjoa'cho ra síjé ijo-ná: koni jñà ra kjoachijngi, kjoa'cho ra 'nó tjé tjín, ko kjoa chinga ra 'cho níkijsjeén, ²⁰ ko nga 'yaxkén nainá xkósòn, ko ra kjoatj'ee, ko nga majticheé xàngieé, ko nga bixkàn-keé xàngieé, ko nga machinicheé xàngieé, ko 'kia nga ta ndìton majti-ná, 'kia nga nachrjengieé xàngieé nga mejèn-ná nga jién kitsajna ítjén, ko nga nijòyeé xàngieé nga xìn maxkóyeé, ²¹ nga maxitakòn-cheé xàngieé, nga ma'chieé, ko nga'tsi kjoachrjá'a ra ma ñánda nga bitjo 'sí, ko nga'tsi kjoa ra ya mangásòn-ko jñà kjoa kii. 'Koaá 'sín tíxin-no koni 'sín ijye asa kíxin-no nga 'sa ítjòn, nga jñà xita ra ko'sín tjín kjoa ra 'sín, nímé kjonda tjábé-là ya ñánda nga jè Nainá tíbatéxoma.

Mé kjonda ra tsjá jè Inìma Tsje-là Nainá

²² Tanga jñà kjonda ra tsjá jè Inìma Tsje-là Nainá, jè-ní nga tsjacha 'sieén xàngieé, nga tsja 'se-ná, nga 'nchán kitsajneé, nga jchíñakjoa-lá xàngieé, nga tsjakjoa 'sieén, ko nga 'sieén kjoanda ra nda tjín, nga kixi kongíkeé kjobítsjen-ná, ²³ nga indakjoa 'sieén, ko nga kixi kotéxoma-lá ijo-ná. Jñà kjoa kii, tsìn kjotéxoma ra kondra tíjna-là. ²⁴ Jién ra ijye xita-là Cristo 'mì-ná; nga'tsi jñà kjobítsjen ra 'cho tjín ko jñà kjoa'cho ra síjé ijo-ná, yaá kinì'keén ya a'ta krò ra isitja'bá'ta Cristo. ²⁵ 'Ndi-ni, 'kia nga a'ta 'tse Inìma Tsje-là Nainá titsajnakon-ná, ko'sín kosen ndiyé ijo-ná koni 'sín jè Inìma Tsje-là Nainá batéxoma-ná.

²⁶Mi kì kǐ'ndeé nga jè kjoa'ngatakòn katasíkijne-ná nga sijticheé xàngieé kò nga kochinicheé xàngieé.

Kó'sín machjeén-ní nga ngásòn kisikeé jñà xàngieé

6 ¹Jìòn 'ndsé kò tichjeé, tsa tjín i'ka xàngioo ra ya kàjìn jé, jìòn-jìòn ra nda titsajna a'ta 'tse Inìma Tsje-la Nainá, nda xita tikoo kò tisikoo mé-ni nga katamakixiya india-ni; tanga tikindaa ijo-no ra jìòn, mé-ni nga mì jé skajin-te-no ra jìòn. ²Tisikoo kañá jñà xàngioo tsa 'kia mé kjoa ra chjá ma-no; 'koaá 'sín koma-ni nga siitjasòn jè kjotéxoma ra kitsjà Cristo. ³Tsa tjín i'ka xita ra nda bachrjengi ijo-la, tanga tsa mí tsa kixi-ni kjoa, tijná inchi'ndisoko-ni ijo-la. ⁴Isaá nda-ni tsa ítjòn kjón nda chítsijen-jnó ijo-no mé kjoa ra inchi'nià. Tsa nda inchi'nià, maá tsja kata'se-no, tanga mì tsa tsò-ni kjoa nga isa nda inchi'nià jìòn koni ra kj'í xita. ⁵Nga jngó jngó xita, kja yaá kjinè-la a'ta 'tse mé kjoa ra 'sín nga jngó jngó. ⁶Jñà ra inchi'kotáyá 'én nda-la Nainá, machjeén-ní nga katabasikò'ta tsa mé ra machjeén-la jè xita ra bakón-ya-la. ⁷Kì kò'sín chìndochà-la ijo-no: nga niyá ra ma siískáko jè Nainá; koni 'sín tjín kjoa ra 'sín jñà xita, 'koaá ti'sín tjín kjoa ra sakó-la. ⁸Nga jè ra kò'sín 'sín koni 'sín mejèn-la ijo-la, kjobiyaá sakò-la a'ta 'tse kjoa ra síjé ijo-la; tanga jè ra kò'sín 'sín koni 'sín mejèn-la jè Inìma Tsje-la Nainá, jé sakò-la kjobinachon ra mì fehe'ta skanda ta kjiá-nioo. ⁹'Koaá ma-ni nga mì kì machjeén nga kosi-ná nga síhitjasén kjoa ra nda tjín; nga kijchó nichjin nga sakó-ná kjonda, tsa mì kì síkjahajen-lá takén. ¹⁰Tsa 'kia ma ra 'nié, kò'sín nda sikoo ijyeeé nga'tsi xita, ma'tsia kjòn-ni kò jñà xita xàngieé ra ngásòn makjiín-ná a'ta 'tse Cristo.

Jè kjoa ra síkijna ítjòn Pablo

¹¹Chítsijen-la kó kjòn tsiña-ni jñà letra ra ndsa tíbindá-na. ¹²Jñà xita ra kjo'ño 'sín-najìòn nga mejèn-la si'ta chiba ijo-najìòn ra kjoa 'tse circuncisión, ta jé ra mejèn-la nga jñà nda kítsajna ya ngixkon xita ra i'ka, kò majìn-la tsa yá ra koaàtjìngi-la ra ta ngatjì-la nga kò'sín makjiín-la nga yaá sakó kjonda a'ta 'tse nga krò 'ken'ta Cristo. ¹³Jñà xita ra tjí'ta chiba ijo-la ra kjoa 'tse circuncisión, skanda mí kì síhitjasòn-ni koni 'sín tjín kjotéxoma, tanga 'koaá 'sín 'ño mejèn-la nga katasi'ta

chibá jìòn, mé-ni nga a'ta tsajìòn nda sìikítsajna-ni ijo-là 'kia nga ijye tjí'ta chibá jìòn. ¹⁴Tanga ra 'an, nímé kjoa tjin ra mejèn-na nga a'ta 'tse nda síkíjna-na ijo-na, tajngoó a'ta 'tse koni 'sín makjiín-na; nga yaá sakó kjonda 'kia nga makjiín-ná nga krò 'ken'ta Jesucristo ra tjna ítjòn-ná. Yaá nchrabá-ni nga mì tì mé kindá 'sin-na jñà kjoa'cho ra tjin ì isà'nde; ko ra 'an, mì tì mé kindá ma-na ya ajin kjoa'cho kii. ¹⁵Ra a'ta 'tse Cristo mì tsa jè ra chjí-là a tjí'ta chibá-ná 'tse circuncisión, o ra mí tsa tjí'ta chibeé; jè ra chjí-là nga jè Nainá ijyeé xita xitse ki'sín-ná. ¹⁶Kata'se-là kjo'nchán ko kjohimatakòn ya ajin inìma-là nga'tsì ra ko'sín inchifìko kjohixi-là koni 'sín tsò 'én ra kotíxian-là, jñà ra ngi kixi kjoa nga xita naxindá-là Nainá ma.

¹⁷Koaá 'sín tíxin-no kì tì tsja kotjín kjoa ra fatsji-isa-ná; nga takó tjí'ta nijndaá-isa ijo-na a'ta 'tse kjohi'in ra kitsjà-na xita, ra ta ngatji 'tse Jesús ra tjna ítjòn-ná.

Kjoa nìhixo'ta ra fehe'ta-ni

¹⁸Jìòn 'ndsé ko tichjeé, jè kjonda-là Jesucristo ra tjna ítjòn-ná nda katijnajin ya inìma-no. Ko'sín katama.